

tota crystallina omnino, ac pellucida est, ut in ipso fundo etiam minutissimi scrupuli appareant; ubi circa ripas humilior est, Lien floribus contegitur; ex lacu navibus non patet exitus, per parvulos enim tantum rivos aqua emittitur ad Boream urbis, qua fossa ac canales replentur, in eo tamen quamplurimæ fabrefiunt naves, quæ inaurata palatia haud immerito dixeris, adeo coloribus variegatis, auroque splendidissimo nitent omnia, quæ omnem ad se trahunt vehuntque conviviorum, spectaculorum, ludorumque apparatus, adeo ut nihil omnino sit, quod non hic helluones, sympotæ, voluptatisque mancipia affatim reperiant: naves à rebus omnibus instructissimæ, lætæ ac securæ lacum perambulant, procul omni naufragii tempestatisque metu amandato, nisi quod forte ex largiori potu aut delitiis immineat. minime ergo mirum quod Sinenses hunc locum atque urbem hortum genialem, seu terræ paradisum vocent.

*Naves
delitiosæ.*

Che fluvius huic Provinciæ nomen dat, eamque mediam fere secat; at prope urbem mutato nomine Cientang dicitur, & ubi originem ducit in Hoeicheu urbis montibus, Singan: hunc fluvium die decima octava octavæ Lunæ (ea in nostrum Octobrem incidit) stupendus ac vehemens maris æstus concitat ad ipsam usque urbem, ut vel hinc Philosophi copiosam disputandi materiam haurire possint; toto quidem anno æstus magnus observatur, at hic & aquarum vi & violentia plurimum reliquos superat: ingentes enim ac montium instar ingrediuntur undæ, quæ fragorem ac murmur edunt maximum, naves omnes, quas transversas occupant, invertunt ac mergunt, demum adeo famosus est, ut ea die circa quartam pomeridianam tota civitas præfectique accurrant, ac maxime exteri, aut advenæ, si qui sint ut prodigiosam hujus diei æstus vehementiam coram oculis usurpent. unde facile conficitur æstum maris, tametsi Lunæ periodis utcumque se accommodet, non à Luna tantum, sed & ab ipsa constitutione orbis nostri terraquei, varioque flexu & recessu littorum, imo & à vario stellarum aspectu atque influxu, subterraneisque exhalationibus ac qualitatibus inde ortis, dependere: cumque mense Octobri maxima fere fiat mutatio temporis, æstate autumnoque in hyemem paulatim declinante, totus quidem hic orbis noster videtur id quodammodo sentire, atque ipse turbari maris fun-

*Æstus
maris
singula-
ris.*

dus, varie affectus pro varia positione climatum atque terrarum, uti in India videmus hyemem imminente Oceanum quasi solito magis irasci, arenamque adeo copiosam in littora evomere, ut portus fere omnes occludat, quos ineunte æstate iterum aperiiri, detergique arenas videmus: id quoque circa promontorii Bonæ spei littora navigantibus, statis anni temporibus, quibus certæ cœli, ventorum, marisque tempestates sunt, longe magis fit manifestum. sed hæc meteororum auctoribus philosophorumque speculationi ac contemplationi relinquo.

Ad Boream urbis, ubi per cataractam aqua lacus emittitur, si quando ob nimias excrescat pluvias, templum idolorum superbissimum visitur Chaoking dictum, in quo assiduæ nundinæ sunt rerum præstantissimarum, rariorumque tum ex Sina, tum ex reliquo orbe allatarum, quæ omnia si cum cæteris hujus urbis minutis describere velim, libro opus erit, quare hic ego manum nunc tollo de tabula.

Secunda Urbs

K I A H I N G.

Peramœno ac fertili agro sita est Kiahing urbs, cujus territorium undique à lacubus arteque derivatis canalibus rigatur. bombycum etiam hic ubique adeo frequens est educatio, ut veris tempore nulla ab iis vacua sit domus. urbs ipsa jacet in aqua dulci, ac ædificiorum splendore, atque amplitudine, opibusque floret, intra ipsa mœnia derivati quaqua versum canales plurimis pontibus strati sunt, ripæque, ut supra sæpius diximus, solidis saxis ornatae, navibusque per aquas, ac per eas pedibus iter est. Illud hic rarum, quod plateas omnes porticus eleganti opere structæ ambient, sub quibus etiam pluvio cælo siccus tutusque ambules. Arcus etiam hic triumphales sunt plurimi, tum extra, tum intra urbem: ad occasum urbis in ipsa canalibus ripa uno tantum loco, per quem navibus itur, quindecim è solido marmore quadrata mole extructi; ubi etiam pons visitur multis arcibus constans, septuaginta passus Sinicos longus; inibi novizonium illustre est. fossarum ripæ omnes quadrato sectoque lapide exornatae, totque ad eas pontes, ut ipsemet ex hac urbe ad metropolim navigans, adnumeraverim nobiliores plurimorum arcuum qua-

*Situs ac
commo-
ditas.*